

die barbæ latioris & rusticæ instar dilatata, altero verò longiùs à capite pyramidaliter ad 10 ferè gradus protensa in locum Soli oppositum, quam tamen progressu temporis sensim ac sensim contrahebat Cometa, ita ut 12 post primam apparitionem die, cincinnis tantùm brevioribus undiquaq; circumfufis, absq; appendice nudus apparuerit. Movebatur, quod palmarium est, non solùm motu cum reliquis stellis communi, sed & proprio, à meridie in septentrionem, in æquali tamen velocitate, tardiùs ut solent circa finem, quàm circa principium.

### CAPUT III.

## DE ORTU COMETÆ.

**Q**uod ortum ejus concernit, & primam ut ita dicam Nativitatem, equidem ejus certum & verum sive cœli sive temporis punctum dicere nequeo, nec forsan ullus in hac nostrâ latitudine septentrionali poterit, ut postea patebit. Apparitionis autem mihi tum temporis Lipsiæ commoranti factæ principium dies sibi vindicat 9 DECEMBRIS, quo die, cum vespertino tempore post Solis occasum stellas in Cœlo disseminatas oculari inspectione dignoscendas Dominis Auditoribus meis, quos tum in Astronomico Collegio habebam, proponerem, Cometa hîc primùm sese mihi conspiciendum præbuit, radiis longè latèq; diffusis oculos stellas ortivas perlustraturos ad se quasi rapiens, suoq; lumine albicante replens. An eodem die primùm in cœlo genitus aut accensus fuerit incertum est. Hoc tamen ex ratione motus, quo circa tempus illud progressus est Cometa, certum omninò videtur, biduo ante meam hanc observationem in nostro quidem Horizonte, vix à quoquam observari potuisse Cometam, eò quod tùm temporis 20 gradibus ad minimum meridionalior infra terram totâ die delituisse, aut saltem Horizontem nostrum leviter strinxisset, utut vel maximè in cœlo extitisset. Pridiè ejus diei, quo primùm nobis apparuit, Horizontem nostrum oriendo simul ac occidendo, licet arcu minore, transire nobisq; circa mediam noctem apparere potuisset, si jam actu extra causas fuisset; sed cœlum nubibus obductum prohibuit aspectum. Proinde, quàm certi quid de primo accensionis momento afferam,